


CBETA電子佛典集成

CBETA Chinese Electronic Tripitaka Collection
ebook

X01n0015

淨度三昧經

中華電子佛典協會

A decorative flourish consisting of stylized, symmetrical scrollwork and floral motifs in a golden-brown color, positioned at the bottom of the page.

目次

- [編輯說明](#)
- [章節目次](#)
- [卷目次](#)
 - 1,
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 15

佛說淨度三昧經卷第一

聞如是。一時佛在羅閱祇神鳥山中。與大比丘眾俱。比丘二萬五千。皆阿羅漢。神通已達。脫於恐懼。已過諸畏。畏無所畏。三脫無礙。空無三昧。無相三昧。無願三昧。其心空寂。皆入空慧。辨才無礙。菩薩七萬八千。皆住無畏三昧。普光三昧。有還淨戒三昧者。已得不動三昧者。已得了生三昧者。有得法雨三昧者。大尊明士。漚和拘舍羅。智積無限。辨才無侶。智度無極。已寶七藏。心空無礙。淨如水月。無心意識。已脫死地。度無恐懼。畏無所畏。五眼明達。觀三界五道。轉化受形。顛倒羅網圍繞。罪福自追。圍繞其身。迴流不絕。人物之屬。有識之類。沒溺愛海。苦痛愁惱。都無覺知。而自謂為樂。遭逢苦厄。不知迷行致之。而反怨天。遂益愁憂。毒心亂起。惡心滋其。沒命經入三塗。考治萬端。五毒兼備。受罪數千億劫。形罪雖竟。化成惡形。更受百畜之身。出一身入一身。出一識入一識。忘本識。周旋五道。終而復始。輪轉無際。迴流不絕。目視三界生死苦畏。為六欲所溺。其於須彌山。沒溺大海。無有出期。雖爾天地衰老。劫盡火燒。海水乾竭。須彌山猶有出期。三界之群生。為六欲所溺。甚於須彌山。菩薩大士觀見審諦。愍傷愚憊。凶駭之人。未見生死參差。世尊開演正法。恤化三界。齊渡五道。斷諸徑路。滅生死火。開虛無門。安入涅槃宅。現自在之制。無我結解。見生死之縛。十二癡本。六十二見。令眾結解脫無罣礙。世尊道化。善安利業。諸天人民。菩薩大士。輔佐世尊。蕩除三界。開絕三塗。開三善路。世尊滅變。感動魔眾。盡一佛境界。天地六返震動。人天易色。魔眾一切鬼神龍阿須倫官屬。悉感動不安。諸天龍鬼神阿須倫等。各各官屬。皆自於所惶怖。自歸命佛。佛悉愍傷。放白豪相光。往而安之。光明徹照世二天。下照十八地獄。極佛境界。薑場佐右。莫不歡喜。尋光即到佛所。諸天帝釋。天子王女。天上諸大尊。神妙諸天神魔王。及諸官

屬。司錄司命。三十二鎮王。柱天將軍。特進兵王。律法義都曰公科車赤符郎。功曹使者。天侯太一。四天大王。太子使者。一時悉皆尋光至佛所。稽首歸命。皆佛足。繞佛七匝。禮佛訖。玄住空中。諸龍王阿須倫王。將官屬。尋光而至。稽首歸命。禮佛畢訖。侍佛後面。諸天神王。釋梵四天王。上至三十二天。及諸天子。輔天將軍。皆持天上華香寶王。赤真珠。摩尼珠。辟玉。金銀水精流離車渠。馬瑙幡綵。琦珍寶蓋。名香雜香。澤香揭香。珍琦寶物。盡天上所有。賈持供養世尊及諸尊菩薩大弟子。十八地獄。皆悉休息。監官屬皆尋光而至。歸命稽首。繞佛百二十匝。叩頭悔過。禮拜畢訖。住佛右面。地獄濫官。玄都王。聖都王。廣武王。晉平王。玄陽王。武陽王。公陽王。平陽王。廣進王。都湯王。[這-言+爰]慰王。平胡王。璉石王。水官都督。鐵官都督。火官都督。作官都督。土官都督。十八使者。各將諸官屬。尋光而至。頭面禮佛足。三自歸命。悔過拜謝。繞佛七十匝。稽道而立。國王并沙。將十億眾。來詣佛所。清信士清信女二百萬五千人。皆來會坐。凡人數千萬。皆來會坐。別坐左面。聽佛說經。時國人皆疾疫。及臣民行惡凶危。佛慈愍之。恐墮三塗。沒溺苦毒。欲度脫之。故還處靈鷲山。現變感動。無不蒙度。佛告四部眾。及諸天龍。鬼神。阿須倫。閻叉。真陀羅。摩睺勒。鬼神及閻羅官屬。悉皆明聽。各言唯諾唯諾。今受佛教。願聞聖化。垂哀教戒。當奉行之。佛言。三界眾生。食福無行。還墮地獄。合毒害生。死入地獄。論諂欺誑。死入地獄。貪利不止。心懷嫉妬。憍慢自用。更相伺候。共相中害。死入地獄。中正相嫉。佞諂相讎。耶常自正。死入地獄。煞盜姪欺。妄言兩舌惡口。罵詈呪咀。死入地獄。飲酒迷亂。貪色嗜欲。害生可口。死入地獄。慳貪獨食。死入餓鬼。多諸瞋恚。喜怒無時。死為賤人。員責不償。借貸不歸。持頭極觸人。後為畜生。論諂後為鬼神。無所倚屬。種福多怒。合毒瞋恚。後則為龍蛇。戒羸自尊。好為人主。五度不純。死。主地獄。五戒完堅。死則為人。十善行羸。生忉利天以下。十善堅強好欲。生六天以下。一禪生色

天。二禪生無色天。三禪不解空。生二十四天以上。不離於地獄苦。一切諸身形類之屬。各自從心生。種行得之。諸天人民作天行。則得天身。作人行則得人身。龍鬼神平生為人時。合毒瞋恚。好著巾角叉樹。是為龍行。死則為龍。作鬼神行。則墮鬼神中。作畜生行。墮畜生中。作奴婢行。墮奴婢中。作餓鬼行。墮餓鬼中。作地獄行。則墮地獄。忍辱得端正人所樂見。瞋奴得醜陋。恭敬得長且尊。憍慢得矮小且賤。種苦得苦。種樂得樂。作是得是。不作是則不得是。汝等各自種行。隨行受報。乃今有若干種類。受形各異。尊卑貴賤好醜長短不等者何。由心所生。心念不同。故致是報。諸天龍鬼神。地獄王。人民四輩。菩薩摩訶薩。聞佛所說正真大法。罪福證驗。實如世尊慈化之教。形類各異。諸神等無量。各自本未身心。各言受教奉行。原除愚癡。從今更始。立行為本。

佛言。能行四恩四等。無想無願入空定。立八政行。八維務禪。九次第禪。除九思行。十定法者。則離生死。得出三界。不畏三塗之難。履刃木傷。蹈火不燒。處欲不汙在禍不殃。致平等覺。舍利弗。離坐正衣服。叉手長跪。白佛言。諸天人民。鬼神龍。阿須倫閻叉。真陀羅。迦樓羅。甄多羅。摩睺勒。餓鬼地獄。飛鳥走將。識神一等。行地不同。志趣不齊。罪福所應云何。佛言。眾生受形隨行。獲其果報。所墮之處。各隨所習。以致殃福。

文殊師利白佛言。諸法本淨。何因有罪有福。法本無二。心本本無。寧有三也。二千本無。尚無一。何況二也。心無本。心無男女。心無大小。心無尊卑。心無若干。心空空。如泥洹空。心如本無空。心之無形。其心為神舍。神亦無形。神神去。法空空。如神空。神空如本無。三界空。五道空。萬物空。四大空。地水火風空。等無有異。吾我空。眼耳鼻口身心意識。此八本空。本來空本清淨。色本空清淨。痛痒思想生死識本空清淨。吾我本清淨。身心本清淨。三界本清淨。人物本清淨。眼耳鼻口身心六事本清淨。地

水火風空本清淨。青赤白黑本清淨。文字亦空本清淨。一切諸法空清淨。般若波羅蜜本清淨。三界如幻。人亦如幻。色痛痒思想生死識如幻。五陰六衰亦如幻。色生色死。色起色滅。無常如幻。痛痒思想生死識。識生識滅。無常如幻。生老病死無常如幻。飢渴寒熱。無常如幻。四大非真。色滅速朽。皆歸無常。計本來無色。痛痒思想生死識亦本無。吾我本無。五陰六衰本無。地水火風雲本無。諸法本無。三界本無。人物本無。有我世無我世我所非我所本無。有想無想本無。有佛想住如故本無。佛哀世故。化現佛身。欲還眾生。使還神本無。本無無住。無來無去。無捨無取。無著無縛。無生無死。不存不滅。寂若虛空。不起不滅。無增無減。無苦無樂。無憂不憂。心法本無。是為還神。還歸本無。譬如人遠客遊。在他邦窮困。積有年歲。數在他邦犯事。閉繫牢獄。獄吏難惡。酷毒掠治。五毒兼備。冀望意氣。孤獨一身。僑在他鄉。身在獄中見閹。保身無賈用。外無知識父兄妻子。遠故鄉里。既無知者。受罪窮厄。飢不得食。困得脫出。今復歸家。身得安隱。不乏衣食。快樂無極。人從生死恐畏生老病死痛地獄之苦。而得歸還本無。休神涅槃。寧不喜耶。佛言。如是如是。眾生從苦得樂。從痛得愈。從飢得飽。從寒得恩。從熱得涼。從死得生。從貧得富。其人乃更諸苦。各若干返。然後脫此諸苦。事事快樂。其人寧喜不干。

文殊師利白佛言。其人前苦今樂。甚大歡喜不可言。佛言。人出大生死。得度至涅槃無為。快樂無極。所願已得。心即從計。所作已辦。離諸熱惱。無復生死。神存自在。長得解脫。爾時大眾在坐者。諸天人民。聞文殊師利說本無特。千比丘意解漏盡。皆得應真。八千菩薩皆得無所從生法忍。八萬天人皆得不起法忍。五千天人發無上正真道意。八百清信士皆得歡喜忍。五百比丘發無上正真道意。六十比丘尼漏盡意解。百萬天人得諸法法眼淨。二百清信女皆得道迹。說是法時。大人八種聲。上至梵天。下聞三塗。地獄餓

鬼苦痛休息。聞法寶音。盡發無上正真道意。畜生飛鳥走狩。聞法之音。心發善念。畢此一身得人道者。我當作沙門行佛道。地獄王監官屬。皆發無上正真道意。天龍鬼神盡發慈心。國中人民。其得病者。即皆歸命。亦發無上正真道意。

文殊師利白佛言。諸天人民群萌之類。皆更三塗之苦。今皆發慈心。因其善心。盡可得度。佛告。天人雜類。心意識淨者。便可盡度也。佛即放身相光。五色曄曄晃晃。盡恒邊沙佛刹。其見光者。諸法法眼淨。尋光得六法證。盡入律行。地獄餓鬼。走狩飛鳥。尋光發意。願畢形受得為沙門。奉行清化。當求佛道。諸天人民皆得清淨戒。凡人二萬二千皆得道亦。求五戒。為清信士女。佛即許五戒。地獄王閻羅起正衣服。正心正意。頭面著佛足。長跪叉手。白佛言。我所典治百三十四獄。其一大涅槃中。有數千億百萬罪人男女。不可計數。大涅槃有八中涅槃。中涅槃有三十小涅槃。小涅槃有九十六小涅槃。有千里二千里四千里八千里萬六千里者。數千萬里者。罪人滿中。復有監官小王。令長都督。五官使者。盡屬我。天中天世尊大赦。大千蒙度我壽未盡。當何所統攝耶。佛告涅槃王。盡赦百三十四獄。因并諸餓鬼鬼神龍阿須倫飛鳥走狩。盡放之。如是不久。王獄隨滿。不過一日。王莫愁耶。王當發慈心。愍傷眾生。不可求名。與天王魔王阿須倫。共爭求名。不可以主民多為尊。欲求累劫尊貴。約五從戒。行六度。四恩四等。四禪四諦。忍辱柔和布施。調意寬仁。慈愍眾生。救濟苦人。卑下天下。損棄強良驕慢之心。滅除貪婬。斷絕婬鬼之種。立清潔之行。王當觀察涅槃中罪人。坐何等而見孝治。涅槃中不治善人。但治惡逆無行無義無仁無慈無禮無信慳貪。不信三尊無反復。唯治貪婬嫉妬愚癡人耳。不問豪尊卑賤。罪同一統。不問男女少老好醜。有識之屬。作罪得罪。作福得福。為罪福所錄。無有地方所。海水山石聞。脫止。不受死。王言唯受教。輒奉持之。不失尊教。常宣正法。教化罪人。合發善心。使得解脫憂苦。

法自在菩薩白佛言。三界眾生。豈得自在。欲至無上正真大道。以成阿耨多羅三藐三菩提者。斷滅三塗生死之熱惱。欲求除己之殃。拔地獄之罪名。削棄五官之赤籍。濟度三界往來之難。拔生死之根。滅除五處名籍。還神本無。蕩除三界之想垢。淨六神宅。平治泥洹之徑路。為眾生開泥洹門。閉塞三流之川。斷絕生死之徑。難易云何。佛告法自在菩薩。汝慈心多愍。能為一切眾生重任。憂念天下人雜類。乃作是問。欲度人故耳。佛告法自在菩薩。及眾生大士。皆悉明聽。善思念之。內著心中。佛言。愚夫樂生死。如睹居澗中。恣情放心意。自種生死根。輪轉更五道。因立五處籍。繫綴在五道。迴行不休息。皆由心所種。貪為死徑。愚癡為泥塗。沒溺不得出。嫉妬為罪本。貪利為自衰。老不止姪。風夜不學。有財不施不受。佛言。有此八者。為自欺身。放逸入三塗。百罪從心生。心為泥洹君。道在身中。自心致之。不從他人求。何有難于。從他人得者。爾乃為難。心之出入。往來無門。周流遊洋。住止無處。心無端[病-丙+亟]。亦無端緒。無形無像。無遠無近。無彼無此。無大無小。無老無少。無好無醜。無男無女。心之自然。生死自然。罪福自然。道法自然。高士制御止意法自然。泥洹慎敘聖諦。入八正行。却八耶業。除九思。求十慧。致十神力。悉無所畏。十八不共積功。致泥洹寂然無為。不動不搖。無生不生。無死不死。獨拔持出。滅三界苦。除五處籍。獨步無畏。得無比行。入大總持門。得無邊底三昧。則得成阿耨多羅三藐三菩提。

法自在菩薩白佛言。心得自在。何因有若干種類。為五道主所見錄籍。生死名不除。佛言。心者心不見心。有心不知心之自然。心尊心使。中心念善。即言即行。中心念惡。即言即行。心無黠計。心迷行或。心癡意愚。計身有常。親愛是身。謂是我許沐浴櫛疏。好衣美食。先欲與之。東西走作。慙苦思慮。求索財寶。官爵奉祿。香華瓔珞。莊飭是身以求榮。名字定空。空無所有。三界不子空。怨求空名。為名色六入更樂痛痒思相生死識五陰六衰所誤種生死哉

生沒迴旋。往來不絕。繫名五道。皆求貪欲恩愛。為生死本。是法無常。人亦不住。如水常流。猶如幻化。忽生忽死。亦無常形。又無常名。放心在欲行者。欲增其哉。貪色日夜。長禍離愛。則無患貪。欲意為田。無厭行為種。斷貪除利業。離愛無憂患。從是拔苦根。棄苦昇紫堂。永離生死惱。終如不復更長存。得自在五處。為都滅神籍。不復用制命。為人尊宗仰。如帝王尊。獨無能過。是故稽首禮。

佛說是時。坐中萬菩薩皆得阿惟顏。八百比丘皆得無所從生法忍。七萬天人皆得法樂忍。三十萬天人發無上正真道意。三十萬清信士皆得柔順法忍。十萬清信女皆得歡喜忍。五千比丘尼皆發無上正真道意。六十萬鬼神龍王皆還總持門。司[棣-木+(上/矢)]司命。三十二鎮臣。持進王。輔天將軍。太子。使者。皆得淨光三昧。侍從盡得不還道。五道大王與眷屬。具足得往來道。地獄王小王凡有百三十七人。意平等。悉得阿惟越致。官屬臣下凡十億得信忍。凡士凡女合十億。皆得道迹。莫不過度。病疾除愈。盲者得視。聾者得聽。痾者能語。拘辟者得手足。女人懷任。母子俱安。飛鳥走狩。其聞法者。盡其盡命。皆生天上。諸天帝釋皆持七寶蓮華。名香揭香。澤香雜香。繒綵華蓋。天幡統縵。以為供養。天人天子玉女。各各持華香幡采珍琦雜寶。皆散佛上。及諸菩薩大比丘上。天尊威變。化成大殿。莫不歡喜。發於無上正真道音。皆禮佛足。

爾時國王泐沙。與大臣長者三百人離坐。叉手長跪。白佛言。吾等之在大生死。沒溺穢海。五毒苦樂諸道皆更。為老病死恐所司。愁苦叵言。佛言。一切眾生。其在大生死中者。有十習苦。何謂為十習。一者生苦。二者老苦。三者為病苦。四者為所愛別苦。五者一切不可意為苦。六者怨憎苦居苦。七者愁憂苦。八者飢渴苦。九者寒貧苦。十者死苦。復有三苦。一者地獄苦。二者餓鬼苦。三者畜生苦。復有二苦。一者鬼神龍苦。二者不得自在苦。皆由習所致。

苦。習諸盡者則苦滅。是十習行。事屬五官。五官屬閻羅。閻羅屬佛。泐沙王白佛言。我有併文昆弟。流沙無戒。不知屬何官府。有何罪事。得病三年。于今不差。世尊難遭。願聞其意。若令罪大。得病當即死。罪小者不應久病。天地聞盡。有幾許臺閣官府監司。幾部人犯幾過為罪。何者為小罪犯。何過為大罪。人死不同。有老而死者。有壯而死者。有少死者。有病死者。有平死者。為官府所煞者。賊殺者。燒死者。水死者。餓死者。凍死者。渴死者。牛馬所煞者。若干種死。魂神所歸云何。願佛垂哀。開示盲冥。令知禁防。有可避者不。

佛告王曰。凡人無戒。復無七事行者。死屬地獄。為五官所司錄命。屬地獄天子。天子名閻羅。典主佛界。諸天人民。鬼神龍。飛鳥走狩。皆盡屬天子。小王有八王。復有扶容王三十國。扶容王各復有小統九十六國。各各所主不同。復有外監五官都督司察司錄八王司者司隸等。與伏夜大將軍都官[序-予+(丑/丑)]騎。承天帝符。與五道大王。共於八王日。風行覆司案行諸天人民。夷狄雜類鳥狩。以知善惡分別。種類若干。億萬里數。分部薑界。所屬司徵。君王臣民。疏善記惡。以奏上扶容。扶容王轉奏八王。八王復轉奏大王。大王奏天子。人民所犯。凡二十事。最重云失身。死不復主。遂墮三塗。永以不迴。億千萬不可計劫。乃出為畜狩。二十惡行引人。著三十八大苦處。大涅槃中。中涅槃各有城墉。有八大王小王三十。第一平胡王。典主阿鼻。摩訶涅槃中。有大釜准。廣縱四十里。其深亦爾。罪人滿中。但坐煞生姪盜。不孝不中。第二晉平王。典治黑繩地獄。中有鐵繩。有三刃四孤者八孤者。拼直人身。鋸解之戒。斧斫人身。或四方或八角。但坐犯五逆煞生。柔牟刀斧。害人及畜狩。姪盜嫉妬恚癡。第三莽都王。典治鐵囚獄。治莖人身。如莖麻油。但坐鎮沓煞人及諸眾生。第四輔天王。典治合會獄。中有大鐵釘。釘人身百節。痛徹遍人身。空中自然兩大石。碎破人身。身忞如麵。但坐誹謗聖道。毒念向佛真人菩薩。反逆不

孝。斷法斷功德。輕慢父母師友及所尊。煞生無道。以致斯殃。第五聖都王。典治太山獄。人適入山。山自然合。破碎人身骨肉。屎尿合碎。如芡蒲陶汁。但坐犯五逆罪。嫉妬愚癡瞋恚。尊己賤人。不順父母師友君父正教朋黨賊盜姪欺煞坐所致。第六玄都王。典主大城。獄火燒人。身焦燃盡。但坐欺中人無信。衣食他衣食。貪利不肯布施。凍餓人使。身貪好服所致。第七廣武王。主治劒樹獄。獄中刀劒亂風吹。斫破人身無完皮。復大鷲所食噉。但坐屠煞射獗。心心為惡。故受此殃。第八武陽王。典主嚙吼獄。中有狗斷人頭。飲血噉肉。但坐心口身行煞人及畜狩類。倩人煞人。教人煞生。故致此殃。第九牢陽王。主治八路獄。中有利劒。遍地間無空。人走其上。截足斷跌。但坐喜行無慈心。齊日相使破壞法橋。損眾生。強教人犯禁。故致斯殃。第十都陽王。典治刺樹獄。獄中樹刺長三丈。人適上樹。刺下逆人。人適下樹。刺上逆貫。刺人身皆破傷。但坐無戒受人信施。服飭珍□。常矛刀所刺。介[斤*國]鈗鈴人。念愛身。賤他人。□嫉害眾生。使獲此極殃。第十一消陽王。主治沸灰獄。獄中有熱沸灰河。入其中。身悉爛□。但坐得羊睹雞害生可口。飲酒迷亂。臥沙門被枕中。口出惡語。無有慈心。以獲此殃。第十二延慰王。典治大噉獄。鐵城覆蓋。開其門戶。大火四起。燒其罪人。但坐誣謗三尊及良善人。焚燒山澤。害眾生命。剝脫人衣。讒害人。不孝三尊及其二親。僞慢自恣。無戒信故。致此極殃。第十三廣進王。典主大阿鼻獄。五毒治之。破解人身。披挖人身。如張牛皮。大釘釘之。心手足支節皆遍。及眼舌耳鼻皆通徹。但坐犯五逆十惡并五戒。以致此殃。第十四高都王。主治鐵車獄。獄中人鐵犁。[禾*并]舌上。車鑠□人身。但坐虐欺兩舌無信。輕慢善人。役人三刀。自謂應然。故致斯殃。第十五公陽王。主治鐵火獄。炭火然至人膝。坐捨正入耶。不信善人沙門師友父正教。數行來蹈煞虫蜎。不持齋或。或心持齋脚行。以致此殃。第十六平[魚*斗]王。主治沸屎獄。廣長極深。罪人入中。身體熟爛。虫攢人身。徹髓筋。鼻穢。坐不布施。強迫人煞生養身。以致

斯殃第十七柱陽王。主治地獄。燒人足到。地即焦燃。坐人律戒不能忍。坐數行來白衣舍。齋曰脚行來。害眾生所致。第十八平[一-一+(司-(一/口)+入)]王。典治彌離獄。獄中[口*(佳/乃)]虫。有如鐵錐。啄人肌骨。皆合盡。但坐捕撮眾生肌汁。煞生養身。故致其殃。第十九璉石王。主治山石獄。獄中有石。利如刀刃。與人膝等。或高五寸。足蹈走上。或上或下。截足斷趺。剝脚斷筋。石利如刀。八王日不行道。心雖念善。足行遊逸。令六神飛揚。天宮所察。以致斯殃。第二十狼耶王。主治多洄獄。獄中有熱風。與人相逢。吹口辟地。嗚呼之極。求死不得。求生不得。生時口口惱人所致。第二十一都官王。主治黎洄獄。獄中有大噉人鬼。身中出六十刺。而貫人身。身中出火。燒人食之。但坐姪妹犯人婦女及畜生。煞眾生。故致斯殃。第二十二玄陽王。主治飛虫獄。虫飛來食人不置。四面來無數。但坐射獮蚊虻之對。故致斯殃。第二十三太一王。主治湯河獄。流河水熱。過於世間沸麻油。但坐煞生羅網。捕魚[篇-戶+合]卵。飲酒亂失十五行。故受此殃。第二十四合石王。主治大磨獄。廣縱二千里磨。磨人如麵。但坐煞生可意。研煞眾生。垣石相須。可煞[虫*蚤]蟣。故致此殃。第二十五涼無王。主治寒雪獄。獄中罪人寒凍。但坐凍煞眾生。煞後剝脫他人衣。禁固眾生。著寒中不施和溫之所致。故受斯殃。第二十六無原王。主治鐵杵獄。燒杵正赤。刺人咽中。脣舌腸胃。皆悉焦爛。但坐惡口求味。身行惡。心念惡之所致。故受斯殃。第二十七政始王。主藏鐵柱獄。燒柱正赤。令人抱之。或臥燒鐵床上。為姪鬼所食。但坐心口身姪所致。故受斯殃。第二十八高遠王。主治膿血獄。血食食生。不淨施人。貪姪所致。第二十九都進王。主治燒石獄。燒石正赤。令人口之。焦爛腸胃。俱坐無戒。食人信施食。不持齋戒。斷絕人福。以為己有之所致。故受斯殃。第三十原都王。主治鐵輪獄。燒輪正赤。自然出人頭上。但坐騎度父母師友君王夫主及所尊特頭。極觸人持沙門頭。形咲蹇吃禿人。蹈師友父影。火燒人頭。故致此殃。是為世大劇苦涅槃。犯是二十大過者。皆更遍三十涅槃

黎。積不可計。劫大涅槃形竟。次入百四小涅槃終劫竟。從地獄出。當更餓鬼畜生奴婢下賤。積億億萬劫。萬恒邊沙數。一沙為千劫。盡萬恒沙數。乃復為人數。得為人口中恒鼻。口舌妄來。多病不利。為人短命。犯是二十事者。今現世不利。當為諸天地獄所司。神明聽察。疏記罪福。不□尊卑。一月六奏。一歲四覆。四覆之日。皆用□□一日。八王日者。天王案比諸天人民雜類之屬。考校功最。有福增壽。有罪減壽奪竿。天地浩浩。黎庶無數。諸天地獄。五道大王。司命都錄。五官都督。四鎮王使者。承天大將軍等。春秋冬夏承天統攝。禁察非法。總持眾生口藉。制命長短。毛分不差。人民音冥。了不知天地五官所記。不能自知生所從來。死至何所。不能自知命之長短。不知為五官所收錄。不知豫作善求安。不知豫作功德救罪。亦不曉依附三尊。求後世救。不曉求守戒明經道士。從求度世道。如牛老敗不中用。大家言此牛老敗不中用。煩勞救養父。已無益我家。但當早煞。可得肉食。亦可除煩惱。人亦如是。不奉持戒禁。亦不作功德。如牛煩勞大家甚多。不益大家。又不能自活。人依道生。道氣養之。不肯奉道。亦不能自度。為五官所牧。死付地獄。□屬世王所持如是。

淨度經卷第一

[CBETA 贊助資訊](#)

[.\(https://www.cbeta.org/donation/index.php\)](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
